

Incertidumbre ta sigui riba proceso di formacion di Gobierno nobo

OTRO siman ta yegando su fin, pero ainda no tin claridad riba formacion di un Gobierno nobo entre partido MEP y partido RAIZ, pero si tin diferente desaroyo tumando lugar, caminda pueblo ta haya e impresion cu cosnan no ta canando manera mester bay y cu lo dura ainda mas tempo prome cu tin un Gobierno oficial.

Te ainda no tin un acuerdo riba reparticion di ministerionan y si tin un acuerdo preliminar mes, e problemanan interno den seno di e partido mas grandi cu ta MEP, ta muestra cu e proceso aki lo tuma algun dia mas.

Ainda no a anuncia oficialmente cuanto ministerio lo tin e biaha aki of si ta bay bek na shete Minister, pero tur cos ta muestra cu den seno di MEP mes ta spera cu lo tin shete Minister p'e partido, loke ta duna indicacion cu RAIZ lo haya un Minister oficial aki na Aruba y kisas un di e dos posicionnan di Minister Plenipotenciario sea na Den Haag of Washington.

Lider di partido MEP, Evelyn Wever Croes no ta dunando si indicacion algun cu lo tin algo for di sla tumando lugar y cu dialogo den seno di su propio partido ta sigui tuma lugar, pero e biaha aki e situacion politico ta totalmente di otro indole compara cu 2017 ora cu a atende cu dos colega di coalicion cu tabata partido POR y RED.

E biaha aki Evelyn como formador un biaha mas, tin cu atende cu politiconan di RAIZ y directiva di e organizacion aki cu no tin experiencia mes riba henter e proceso di formacion di un gabinete y como tal ta surgi e tardansa cu a bin ta tumando lugar.

Loke tabata sigur te cu ayera tardi lat ta cu e candidatonan sigur pa carga puesto di Minister cu ta e propio Evelyn kende ta sigur di ta un biaha mas Prome Minister y encarga cu asuntonan general, tambe ta sigur cu Xiomara Maduro, Dangui Oduber y Glenbert Croes lo ripiti como Minister, pero sin cu ta conoci cual cartera nan lo dirigi.

Despues di e cuaternan aki, ta sigui e incertidumbre ya cu Rocco Tjon lo no sigui como Parlamentario mas, pues lo bay haya un otro encargo como Minister, sea aki na Aruba of na Den Haag of cualkier otro posicion halto, caminda e ta sigura di un cambio sigur.

Eynan caba e ora partido MEP tin cinco ministerio sigura, pero na mes momento e lider di MEP no a menciona con su gabinete lo wordo forma, esta sea cu

8 minister manera su Gabinete anterior, of e lo baha te cu shete minister, loke ta nifica cu si RAIZ haya dos minister, tanto Endy Croes, Arthur Vallego como Hendrik Tevreden, lo no por bira Minister.



Sinembargo for di inicio di henter e proceso aki a bira conoci cu Endy Croes lo ta insisti pa bira Minister y tur cos ta muestra cu e lo bira tambe loke ta indica cu MEP lo tin 6 Minister mientras cu ainda tin indicacion cu Hendrik Tevreden tambe ta anhele pa bira Minister loke lo nifica cu MEP lo tin 7 Minister den e proximo Gabinete.

Riba su mes esaki practicamente ta normal, ya cu e partido tin nueve asiento den Parlamento y RAIZ e ora lo tin cu keda contento cu e lo haya un Minister y lo tin cu keda contento c'un otro posicion sea na Washington of Den Haag.

Ta un hecho cu RAIZ contrario na loke a sosode cu partido POR na 2017, no tin suficiente forza politico pa impone contra di su partner di coalicion cu ta MEP cu simplemente ta "outrank" e hoben partido aki totalmente.

Cu mas hende den MEP no ta contento ta un hecho y den nan propio seno nan frustracion ta wordo muestra riba medionan social practicamente tur dia ya cu tin ainda algun hende cu ta desea di haya un of otro nombramento halto den cualkier compania estatal, usando e base minimo di 11 asiento como e arma pa logra nan metanan.

Si MEP enberdad keda cu 7 Minister, esaki lo nifica cu entre otro Ady Thijsen lo regresa den Parlamento, ora cu tur hende a kere cu su carrera politico lo a yega na su fin.